

乾為天，天地否，天澤履，天山遯，天火同人，天水訟，天雷无妄，天風姤；
 地天泰，坤為地，地澤臨，地山謙，地火明夷，地水師，地雷復，地風升；
 澤天夬，澤地萃，兌為澤，澤山咸，澤火革，澤水困，澤雷隨，澤風大過；
 山天大畜，山地剝，山澤損，艮為山，山火賁，山水蒙，山雷頤，山風蠱；
 火天大有，火地晉，火澤睽，火山旅，離為火，火水未濟，火雷噬嗑，火風鼎；
 水天需，水地比，水澤節，水山蹇，水火既濟，坎為水，水雷屯，水風井；
 雷天大壯，雷地豫，雷澤歸妹，雷山小過，雷火豐，雷水解，震為雷，雷風恒；
 風天小畜，風地觀，風澤中孚，風山漸，風火家人，風水渙，風雷益，巽為風。

乾三連，坤六斷，震仰盂，艮覆碗，
 離中虛，坎中滿，兌上缺，巽下斷。


八卦所屬

乾、兌（金）；震、巽（木）；坤、艮（土）；
 離（火）；坎（水）。

合意

五行	先天八卦方位	後天八卦方位	器官	身體部位	動物	家族關係	性情	自然象徵	卦名	卦象
金	西北	西北	腦	頭	馬	父	健	天	乾	☰
金	西	西南	肺	口	羊	少女	悅	澤	兌	☱
火	南	東南	心	目	雉	中女	麗	火	離	☲
木	東	東北	肝	足	龍	長男	動	雷	震	☳
木	東南	西南	膽	股	雞	長女	入	風	巽	☴
水	北	東北	腎	耳	豕	中男	陷	水	坎	☵
土	西北	北	胃	手	狗	少男	止	山	艮	☶
土	西南	西北	脾	腹	牛	母	順	地	坤	☷

乾



乾，元亨利貞。

初九，潛龍勿用。

九二，見(ㄊㄧˊㄇㄢˋ)龍在田，利見(ㄌㄧˊㄇㄢˋ)大人。

九三，君子終日乾乾，夕惕若，厲，无咎。

九四，或躍在淵，无咎。 无，古文無

九五，飛龍在天，利見大人。

上九，亢龍有悔。 亢：音抗，高也。

用九，見群龍无首，吉。

《象》曰：大哉乾元，萬物資始，乃統天。
雲行雨施，品物流形。大明終始，六位時成，時
乘六龍以御天。


乾道變化，各正性命，保合大和，乃利貞。

(大和：太和也。)

首出庶物，萬國咸寧。

《象》曰：天行健，君子以自強不息。
潛龍勿用，陽在下也。見龍在田，德施普也。
終日乾乾，反復道也。或躍在淵，進无咎也。
飛龍在天，大人造也。亢龍有悔，盈不可久也。
用九，天德不可為首也。

坤



坤，元亨，利牝馬之貞。君子有攸往，先迷後得主利。西南得朋，東北喪朋，安貞吉。

初六，履霜，堅冰至。

六二，直方大，不習，无不利。

六三，含章可貞，或從王事，无成有終。

六四，括囊，无咎无譽。

六五，黃裳，元吉。


上六，龍戰于野，其血玄黃。

用六，利永貞。

《彖》曰：至哉坤元，萬物資生，乃順承天。坤厚載物，德合无疆。含弘光大，品物咸亨。牝馬地類，行地无疆。柔順利貞，君子攸行。先迷失道，後順得常。西南得朋，乃與類行。東北喪朋，乃終有慶，安貞之吉，應地无疆。

《象》曰：地勢坤，君子以厚德載物。履霜堅冰，陰始凝也。馴致其道，至堅冰也。六二之動，直以方也。不習无不利，地道光也。含章可貞，以時發也；或從王事，知光大也。括囊无咎，慎不害也。黃裳元吉，文在中也。龍戰于野，其道窮也。用六永貞，以大終也。

屯



屯，元亨，利貞。勿用有攸往，利建侯。

初九，磐桓，利居貞，利建侯。

六二，屯如遭如，乘馬班如。匪寇婚媾，女子貞不字，十年乃字。

六三，即鹿无虞，惟入于林中。君子幾不如舍，往吝。

六四，乘馬班如，求婚媾。往吉，无不利。


九五，屯其膏，小貞吉，大貞凶。

上六，乘馬班如，泣血漣如。

《彖》曰：屯，剛柔始交而難生，動乎險中，大亨貞。雷雨之動滿盈，天造草昧，宜建侯而不寧。

《象》曰：雲雷屯，君子以經綸。雖磐桓，志行正也。以貴下賤，大得民也。六二之難，乘剛也。十年乃字，反常也。即鹿无虞，以從禽也。君子舍之，往吝窮也。求而往明也。屯其膏，施未光也。泣血漣如，何可長也。

蒙



蒙，亨。匪我求童蒙，童蒙求我。初筮告，再三瀆，瀆則不告，利貞。

初六，發蒙。利用刑人，用說桎梏，以往吝。

九二，包蒙，吉。納婦吉，子克家。

六三，勿用取女，見金夫，不有躬，无攸利。

六四，困蒙，吝。


六五，童蒙，吉。

上九，擊蒙，不利為寇，利禦寇。

《彖》曰：蒙，山下有險，險而止，蒙。蒙，亨，以亨行，時中也。匪我求童蒙，童蒙求我，志應也。初筮告，以剛中也。再三瀆，瀆則不告，瀆蒙也。蒙以養正，聖功也。

《象》曰：山下出泉，蒙，君子以果行育德。利用刑人，以正法也。子克家，剛柔接也。勿用取女，行不順也。困蒙之吝，獨遠實也。童蒙之吉，順以巽也。利用禦寇，上下順也。

需



需，有孚，光亨，貞吉，利涉大川。

初九，需于郊，利用恆，无咎。

九二，需于沙，小有言，終吉。

九三，需于泥，致寇至。

六四，需于血，出自穴。


九五，需于酒食，貞吉。

上六，入于穴，有不速之客三人來。敬之，終吉。

《彖》曰：需，須也，險在前也。剛健而不陷，其義不困窮矣。需，有孚，光亨，貞吉，位乎天位，以正中也。利涉大川，往有功也。

《象》曰：雲上於天，需，君子以飲食宴樂。需于郊，不犯難行也。利用恆，无咎，未失常也。需于沙，衍在中也。雖小有言，以吉終也。需于泥，災在外也。自我致寇，敬慎不敗也。需于血，順以聽也。酒食貞吉，以中正也。不速之客來，敬之終吉。雖不當位，未大失也。

訟



訟，有孚，窒惕，中吉，終凶。利見大人，不利涉大川。

初六，不永所事，小有言，終吉。

九二，不克訟，歸而逋其邑，人三百戶，无眚。

六三，食舊德，貞厲，終吉。或從王事，无成。

九四，不克訟，復即命渝，安貞吉。

九五，訟，元吉。


上九，或錫鞶帶，終朝三褫之。

《彖》曰：訟，上剛下險，險而健，訟。訟，有孚，窒惕，中吉，剛來而得中也。終凶，訟不可成也。利見大人，尚中正也。不利涉大川，入于淵也。

《象》曰：天與水違行，訟，君子以作事謀始。不永所事，訟不可長也。雖小有言，其辯明也。不克訟，歸逋竄也。自下訟上，患至掇也。食舊德，從上吉也。復即命渝，安貞不失也。訟元吉，以中正也。以訟受服，亦不足敬也。

- 1 《集解》讀作「歸而逋，其邑人三百戶」。此依《注疏》。
- 2 「復即命渝，安貞吉」宋明多改讀「復即命，渝，安貞，吉」。

師



師，貞，丈人吉，无咎。

初六，師出以律，否臧凶。

九二，在師中吉，无咎，王三錫命。

六三，師或輿尸，凶。

六四，師左次，无咎。


六五，田有禽，利執言，无咎。長子帥師，弟子輿尸，貞凶。

上六，大君有命，開國承家，小人勿用。

《彖》曰：師，眾也，貞，正也。能以眾正，可以王矣。剛中而應，行險而順。以此毒天下而民從之，吉，又何咎矣？

《象》曰：地中有水，師，君子以容民畜眾。師出以律，失律凶也。在師中吉，承天寵也。王三錫命，懷萬邦也。師或輿尸，大无功也。左次无咎，未失常也。長子帥師，以中行也。弟子輿尸，使不當也。大君有命，以正功也。小人勿用，必亂邦也。

比




比，吉。原筮元永貞，无咎。不寧方來，後夫凶。
初六，有孚比之，无咎。有孚盈缶，終來有它吉。
六二，比之自內，貞吉。
六三，比之匪人。
六四，外比之，貞吉。
九五，顯比，王用三驅，失前禽。邑人不誠，吉。
上六，比之无首，凶。

《彖》曰：比，吉也。比，輔也，下順從也。原筮元永貞，无咎，以剛中也。不寧方來，上下應也。後夫凶，其道窮也。

《象》曰：地上有水，比。先王以建萬國，親諸侯。比之初六，有它吉也。比之自內，不自失也。比之匪人，不亦傷乎。外比於賢，以從上也。顯比之吉，位正中也。舍逆取順，失前禽也。邑人不誠，上使中也。比之无首，无所終也。

小畜



小畜，亨。密雲不雨，自我西郊。

初九，復自道，何其咎？吉。

九二，牽復，吉。

九三，輿說輻，夫妻反目。 說，音義同「脫」

六四，有孚，血去惕出，无咎。


九五，有孚攣如，富以其鄰。

上九，既雨既處，尚德載，婦貞厲。月幾望，君子征凶。

《彖》曰：小畜，柔得位而上下應之，曰小畜。健而巽，剛中而志行，乃亨。密雲不雨，尚往也；自我西郊，施未行也。

《象》曰：風行天上，小畜，君子以懿文德。復自道，其義吉也。牽復在中，亦不自失也。夫妻反目，不能正室也。有孚惕出，上合志也。有孚攣如，不獨富也。既雨既處，德積載也。君子征凶，有所疑也。

履



履虎尾，不咥人，亨。

初九，素履，往，无咎。

九二，履道坦坦，幽人貞吉。

六三，眇能視，跛能履。履虎尾，咥人，凶。

武人為于大君。

九四，履虎尾，愬愬，終吉。

九五，夬履，貞厲。

上九，視履，考祥其旋，元吉。


《彖》曰：履，柔履剛也。說而應乎乾，是以履虎尾，不咥人，亨。剛中正，履帝位而不疚，光明也。

《象》曰：上天下澤，履，君子以辯上下，定民志。素履之往，獨行願也。幽人貞吉，中不自亂也。眇能視，不足以有明也；跛能履，不足以與行也。咥人之凶，位不當也。武人為于大君，志剛也。愬愬終吉，志行也。夬履貞厲，位正當也。元吉在上，大有慶也。

1 或讀作「視履考祥，其旋元吉」。

前者表行為的觀察、過程的考察，以及最終的結果。
後者表行為的審慎與結果的吉祥。

泰



泰，小往大來，吉亨。

初九，拔茅茹，以其彙，征吉。

九二，包荒，用馮河，不遐遺，朋亡，得尚于中行。

九三，无平不陂，无往不復。艱貞，无咎。勿恤其孚，于食有福。

六四，翩翩，不富以其鄰，不戒以孚。


六五，帝乙歸妹，以祉元吉。

上六，城復于隍，勿用師。自邑告命，貞吝。

《彖》曰：泰，小往大來，吉亨，則是天地交而萬物通也，上下交而其志同也。內陽而外陰，內健而外順，內君子而外小人。君子道長，小人道消也。

《象》曰：天地交，泰。后以財成天地之道，輔相天地之宜，以左右民。拔茅征吉，志在外也。包荒得尚于中行，以光大也。无往不復，天地際也。翩翩不富，皆失實也。不戒以孚，中心願也。以祉元吉，中以行願也。城復于隍，其命亂也。

否



否之匪人，不利君子貞，大往小來。

初六，拔茅茹，以其彙，貞吉，亨。

六二，包承，小人吉，大人否亨。

六三，包羞。

九四，有命无咎，疇離祉。


九五，休否，大人吉。其亡其亡，繫于苞桑。

上九，傾否，先否後喜。

《彖》曰：否之匪人，不利君子貞，大往小來，則是天地不交而萬物不通也，上下不交而天下无邦也。內陰而外陽，內柔而外剛，內小人而外君子。小人道長，君子道消也。

《象》曰：天地不交，否。君子以儉德辟難，不可榮以祿。拔茅貞吉，志在君也。大人否亨，不亂群也。包羞，位不當也。有命无咎，志行也。大人之吉，位正當也。否終則傾，何可長也。

同人



同人于野，亨。利涉大川，利君子貞。

初九，同人于門，无咎。

六二，同人于宗，吝。

九三，伏戎于莽，升其高陵，三歲不興。

九四，乘其墉，弗克攻，吉。


九五，同人，先號咷而後笑，大師克相遇。

上九，同人于郊，无悔。

《彖》曰：同人，柔得位得中而應乎乾，曰同人。同人曰：同人于野，亨，利涉大川，乾行也。文明以健，中正而應，君子正也。唯君子為能通天下之志。

《象》曰：天與火，同人，君子以類族辨物[1]。出門同人，又誰咎也？同人于宗，吝道也。伏戎于莽，敵剛也；三歲不興，安行也？乘其墉，義弗克也。其吉，則困而反則也。同人之先，以中直也。大師相遇，言相克也。同人于郊，志未得也。

大有



大有，元亨。

初九，无交害，匪咎，艱則无咎。

九二，大車以載，有攸往，无咎。

九三，公用亨于天子，小人弗克。

九四，匪其彭，无咎。


六五，厥孚交如，威如，吉。

上九，自天祐之，吉，无不利。

《彖》曰：大有，柔得尊位，大中而上下應之，曰大有。其德剛健而文明，應乎天而時行，是以元亨。

《象》曰：火在天上，大有。君子以遏惡揚善，順天休命。大有初九，无交害也。大車以載，積中不敗也。公用亨于天子，小人害也。匪其彭无咎，明辨晢也。厥孚交如，信以發志也。威如之吉，易而无備也。大有上吉，自天祐也。

謙



謙，亨，君子有終。

初六，謙謙君子，用涉大川，吉。

六二，鳴謙，貞吉。

九三，勞謙，君子有終，吉。

六四，无不利，撝謙。

六五，不富以其鄰，利用侵伐，无不利。


上六，鳴謙，利用行師，征邑國。

《彖》曰：謙亨，天道下濟而光明，地道卑而上行；天道虧盈而益謙，地道變盈而流謙；鬼神害盈而福謙，人道惡盈而好謙。謙尊而光，卑而不可踰，君子之終也。

《象》曰：地中有山，謙，君子以裒多益寡，稱物平施。[裒，音掇，聚、取也]謙謙君子，卑以自牧也。鳴謙貞吉，中心得也。勞謙君子，萬民服也。无不利，撝謙，不違則也。利用侵伐，征不服也。鳴謙，志未得也。可用行師，征邑國也。

1 此段或讀作「勞謙君子，有終，吉」。

豫



豫，利建侯、行師。

初六，鳴豫，凶。

六二，介于石，不終日，貞吉。

六三，盱豫，悔，遲有悔。

九四，由豫，大有得。勿疑，朋盍簪。

六五，貞疾，恆不死。


上六，冥豫，成有渝，无咎。

《彖》曰：豫，剛應而志行，順以動，豫。豫順以動，故天地如之，而況建侯行師乎？天地以順動，故日月不過，而四時不忒。聖人以順動，則刑罰清而民服。豫之時義大矣哉。

《象》曰：雷出地奮，豫。先王以作樂崇德，殷薦之上帝，以配祖考。初六鳴豫，志窮凶也。不終日貞吉，以中正也。盱豫有悔，位不當也。由豫大有得，志大行也。六五貞疾，乘剛也。恆不死，中未亡也。冥豫在上，何可長也？

1 悔，遲有悔：或連讀作「悔遲有悔」。

隨



隨，元亨利貞，无咎。

初九，官有渝，貞吉。出門交有功。

六二，係小子，失丈夫。

六三，係丈夫，失小子。隨有求得，利居貞。

九四，隨有獲，貞凶。有孚在道以明，何咎？


九五，孚于嘉，吉。

上六，拘係之，乃從維之，王用亨于西山。

《彖》曰：隨，剛來而下柔，動而說，隨。大亨貞，无咎，而天下隨時，隨時之義大矣哉。

《象》曰：澤中有雷，隨。君子以嚮晦入宴息。官有渝，從正吉也。出門交有功，不失也。係小子，弗兼與也。係丈夫，志舍下也。隨有獲，其義凶也。有孚在道，明功也。孚于嘉吉，位正中也。拘係之。上窮也。

蠱




蠱，元亨，利涉大川。先甲三日，後甲三日。
初六，幹父之蠱。有子，考无咎，厲，終吉。
九二，幹母之蠱，不可貞。
九三，幹父之蠱，小有悔，无大咎。
六四，裕父之蠱，往見吝。
六五，幹父之蠱，用譽。
上九，不事王侯，高尚其事。

《彖》曰：蠱，剛上而柔下，巽而止，蠱。蠱，元亨，而天下治也。利涉大川，往有事也。先甲三日，後甲三日，終則有始，天行也。

《象》曰：山下有風，蠱。君子以振民育德。幹父之蠱，意承考也。幹母之蠱，得中道也。幹父之蠱，終无咎也。裕父之蠱，往未得也。幹父用譽，承以德也。不事王侯，志可則也。

臨



臨，元亨利貞，至于八月有凶。

初九，咸臨，貞吉。

九二，咸臨，吉，无不利。

六三，甘臨，无攸利，既憂之，无咎。

六四，至臨，无咎。


六五，知臨，大君之宜，吉。

上六，敦臨，吉，无咎。

《彖》曰：臨，剛浸而長，說而順，剛中而應，大亨以正，天之道也。至于八月有凶，消不久也。

《象》曰：澤上有地，臨。君子以教思无窮，容保民无疆。咸臨貞吉，志行正也。咸臨吉无不利，未順命也。甘臨，位不當也。既憂之，咎不長也。至臨无咎，位當也。大君之宜，行中之謂也。敦臨之吉，志在內也。

觀



觀，盥而不薦，有孚顒若。

(顒，音ㄌㄨㄥˊ，yóng，莊重虔誠貌)

初六，童觀，小人无咎，君子吝。

六二，闚觀，利女貞。

六三，觀我生，進退。

六四，觀國之光，利用賓于王。

九五，觀我生，君子无咎。


上九，觀其生，君子无咎。

《彖》曰：大觀在上，順而巽，中正以觀天下。觀，盥而不薦，有孚顒若，下觀而化也。觀天之神道，而四時不忒。聖人以神道設教，而天下服矣。

《象》曰：風行地上，觀，先王以省方，觀民設教。初六童觀，小人道也。闚觀女貞，亦可醜也。觀我生進退，未失道也。觀國之光，尚賓也。觀我生，觀民也。觀其生，志未平也。

1 此依朱熹《本義》，言灌禮當潔手而不輕用薦，以示慎重虔誠。盥，洗手。《注疏》讀作「觀盥而不薦」，言灌禮只觀前半的灌禮而不觀後段薦牲之禮，盥通灌。

噬嗑



噬嗑，亨，利用獄。

初九，履校滅趾，无咎。校，音教，四聲。足械

六二，噬膚滅鼻，无咎。膚，膚肉，軟嫩易食

六三，噬腊肉，遇毒。小吝，无咎。

(腊，音昔，乾肉)

九四，噬乾肺，得金矢。利艱貞，吉。

(肺，音梓，帶骨的肉)

六五，噬乾肉，得黃金。貞厲，无咎。

上九，何校滅耳，凶。

《彖》曰：頤中有物，曰噬嗑。噬嗑而亨，剛柔分，動而明，雷電合而章。柔得中而上行，雖不當位，利用獄也。

《象》曰：雷電，噬嗑，先王以明罰敕法。履校滅趾，不行也。噬膚滅鼻，乘剛也。遇毒，位不當也。利艱貞吉，未光也。貞厲无咎，得當也。何校滅耳，聰不明也。

1 噬嗑，音「誓合」。噬為嚙、咬。嗑為合。噬嗑即嚙咬之而使合。

賁



賁，亨，小利有攸往。

初九，賁其趾，舍車而徒。

六二，賁其須。須，鬚的古字

九三，賁如濡如，永貞吉。

六四，賁如皤如，白馬翰如，匪寇婚媾。

六五，賁于丘園，束帛戔戔。吝，終吉。


上九，白賁，无咎。

《彖》曰：賁，亨，柔來而文剛，故亨。分剛上而文柔，故小利有攸往。天文也。文明以止，人文也。觀乎天文，以察時變。觀乎人文，以化成天下。

《象》曰：山下有火，賁。君子以明庶政，无敢折獄。舍車而徒，義弗乘也。賁其須，與上興也。永貞之吉，終莫之陵也。六四當位，疑也。匪寇婚媾，終无尤也。六五之吉，有喜也。白賁无咎，上得志也。

1 或讀作「亨小，利有攸往」，不正確，觀《彖傳》可知。

剝



剝，不利有攸往。

初六，剝牀以足，蔑貞凶。

六二，剝牀以辨，蔑貞凶。

六三，剝之无咎。

六四，剝牀以膚，凶。

六五，貫魚，以宮人寵，无不利。


上九，碩果不食，君子得輿，小人剝廬。

《彖》曰：剝，剝也，柔變剛也。不利有攸往，小人長也。順而止之，觀象也。君子尚消息盈虛，天行也。

《象》曰：山附於地，剝，上以厚下安宅。剝牀以足，以滅下也。剝牀以辨，未有與也。剝之无咎，失上下也。剝牀以膚，切近災也。以宮人寵，終无尤也。君子得輿，民所載也。小人剝廬，終不可用也。

1 辨，《周易集解》作「辯」，下同。

復



復，亨。出入无疾，朋來无咎。反復其道，七日來復，利有攸往。

初九，不遠復，无祇悔，元吉。

六二，休復，吉。

六三，頻復，厲，无咎。

六四，中行獨復。

六五，敦復，无悔。


上六，迷復，凶，有災眚。用行師，終有大敗。以其國君，凶，至于十年不克征。

《彖》曰：復，亨。剛反，動而以順行，是以出入无疾，朋來无咎。反復其道，七日來復，天行也。利有攸往，剛長也。復，其見天地之心乎。

《象》曰：雷在地中，復，先王以至日閉關，商旅不行，后不省方。不遠之復，以修身也。休復之吉，以下仁也。頻復之厲，義无咎也。中行獨復，以從道也。敦復无悔，中以自考也。迷復之凶，反君道也。

1 祇，依朱熹，音「其」，「抵」的意思。或音支、底、低。坊本字或作「祇」。

无妄



无妄，元亨利貞。其匪正有眚，不利有攸往。

初九，无妄，往吉。

六二，不耕穫，不菑畲，則利有攸往。

六三，无妄之災，或繫之牛。行人之得，邑人之災。

九四，可貞，无咎。

九五，无妄之疾，勿藥有喜。

上九，无妄，行有眚，无攸利。

《彖》曰：无妄，剛自外來而為主于內。動而健，剛中而應，大亨以正，天之命也。其匪正有眚，不利有攸往。无妄之往，何之矣？天命不祐，行矣哉？

《象》曰：天下雷行，物與无妄。先王以茂對時育萬物。无妄之往，得志也。不耕穫，未富也。行人得牛，邑人災也。可貞无咎，固有之也。无妄之藥，不可試也。无妄之行，窮之災也。

1 或讀作「无妄往，吉」。

2 《禮記·坊記》引作「不耕穫，不菑畲，凶」。菑，音資，新田。畲，音余，熟田。三歲之田始於菑，終於畲。

3 或讀作「无妄行，有眚」。

大畜



大畜，利貞，不家食吉，利涉大川。

初九，有厲，利已。

九二，輿說輹。

九三，良馬逐，利艱貞。曰閑輿衛，利有攸往。

六四，童牛之牯，元吉。

六五，豶豕之牙，吉。

上九，何天之衢，亨。


《彖》曰：大畜，剛健篤實，輝光日新其德，剛上而尚賢，能止健，大正也。不家食吉，養賢也。利涉大川，應乎天也。

《象》曰：天在山中，大畜。君子以多識前言往行，以畜其德。有厲利已，不犯災也。輿說輹，中无尤也。利有攸往，上合志也。六四元吉，有喜也。六五之吉，有慶也。何天之衢，道大行也。

1 此段諸家讀法不同，如：「大畜剛健，篤實輝光，日新其德，剛上而尚賢。」或：「大畜，剛健篤實，輝光日新，其德剛上而尚賢。」

2 曰閑輿衛，《集解》作「日閑輿衛」，朱熹認為當作日。

頤



頤貞吉，觀頤，自求口實。

初九，舍爾靈龜，觀我朵頤，凶。

六二，顛頤，拂經；于丘頤，征凶。

六三，拂頤，貞凶。十年勿用，无攸利。

六四，顛頤，吉。虎視眈眈，其欲逐逐，无咎。

六五，拂經，居貞吉，不可涉大川。

上九，由頤，厲吉，利涉大川。

《彖》曰：頤貞吉，養正則吉也。觀頤，觀其所養也。自求口實，觀其自養也。天地養萬物，聖人養賢以及萬民，頤之時大矣哉。


《象》曰：山下有雷，頤，君子以慎言語、節飲食。觀我朵頤，亦不足貴也。六二征凶，行失類也。十年勿用，道大悖也。顛頤之吉，上施光也。居貞之吉，順以從上也。由頤厲吉，大有慶也。

1 或讀作「頤，貞吉」，此依《彖傳》讀作「頤貞吉」。

2 王弼讀作「顛頤，拂經于丘，頤征凶」。

3 虎視眈眈，坊本或作「虎視眈眈」。

大過



大過，棟橈。利有攸往，亨。

初六，藉用白茅，无咎。

九二，枯楊生稊，老夫得其女妻，无不利。

九三，棟橈，凶。

九四，棟隆，吉，有它吝。

九五，枯楊生華，老婦得其士夫，无咎无譽。

上六，過涉滅頂，凶，无咎。


《彖》曰：大過，大者過也。棟橈，本末弱也。剛過而中，巽而說行，利有攸往，乃亨。大過之時大矣哉！

《象》曰：澤滅木，大過。君子以獨立不懼，遯世无悶。藉用白茅，柔在下也。老夫女妻，過以相與也。棟橈之凶，不可以有輔也。棟隆之吉，不橈乎下也。枯楊生華，何可久也？老婦士夫，亦可醜也。過涉之凶，不可咎也。

1 橈，木頭彎曲，引申為柔弱。坊本或作「撓」，後同。

2 它，坊本或作「他」。

坎(習坎)



習坎，有孚，維心亨，行有尚。

初六，習坎，入于坎窞，凶。

九二，坎有險，求小得。

六三，來之坎坎，險且枕。入于坎窞，勿用。

六四，樽酒，簋貳，用缶。納約自牖，終无咎。

九五，坎不盈，祇既平，无咎。

上六，係用徽纆，寘于叢棘。三歲不得，凶。

《彖》曰：習坎，重險也。水流而不盈，行險而不失其信。維心亨，乃以剛中也。行有尚，往有功也。天險不可升也，地險山川丘陵也。王公設險以守其國，險之時用大矣哉！


《象》曰：水洊至，習坎。君子以常德行，習教事。習坎入坎，失道凶也。求小得，未出中也。來之坎坎，終无功也。樽酒簋貳，剛柔際也。坎不盈，中未大也。上六失道，凶三歲也。

1 朱熹讀作「樽酒簋，貳用缶」。此句讀依王弼。

2 祇，坊本或作「祇」。

3 中未大也，《集解》作「中未光大也」。

離



離，利貞，亨，畜牝牛吉。

初九，履錯然，敬之，无咎。

六二，黃離，元吉。

九三，日昃之離，不鼓缶而歌，則大耋之嗟，凶。

九四，突如其來如，焚如，死如，棄如。

六五，出涕沱若，戚嗟若，吉。

上九，王用出征，有嘉折首，獲匪其醜，无咎。

《彖》曰：離，麗也。日月麗乎天，百穀草木麗乎土，重明以麗乎正，乃化成天下。柔麗乎中正，故亨，是以畜牝牛吉也。

《象》曰：明兩作，離，大人以繼明照于四方。履錯之敬，以辟咎也。黃離元吉，得中道也。日昃之離，何可久也。突如其來如，无所容也。六五之吉，離王公也。王用出征，以正邦也。

1 耋，音蝶，年八十也，從老省從至。俗作「耄」，上從老。